

ECONOMIA

Se stravardè se instèsc y la familia - almanco da consequènz finanziaries

An alda gonot baian de assicuraziuns privates. Tröpes vègn pitades da promoturs o d'atri. Cì poscibilitè an pa pordèrt? Cì assicuraziuns désson pa fà?



*de Gustl Kaneider,
consulènt dla
Cassa Raiffeisen
Val Badia*

Degöna assicuraziun dl setur privat n'è de oblianza. Mo impò n'en èl òna che iò y tröc d'atri arata che toches te vigni familia: la responsabilitè zivila por la familia.

Chèsta é n'assicuraziun che cür i danns che iò o zacai fora de mia familia i gauja a d'atri (terzi) tratan la vita privata. Por ejèmpl saltè adòm cun i schi o cun la roda. Chèsta assicuraziun pòn ciafè a valgama n bun prisc sòn le marcé, y ara po stravardè la familia da de gragn problems. Sce an n'è bele òna spo mèsson sambègn n pü' valutè i massimai y les condiziuns de assicuraziun por evité de gragn malcontènc tl caje de dann. Por odèi cì somes che al vègn paié por consequènz da inzidènt àn ma bria da lì n pü' i folieç. Cun na spèisa anuala de plü o manco 60,00€ pòn se stravardè da messèi paié instèsc de te' somes.

Inzidènt y/o maratia

Do che an s'è assicuré cuntra i atri mèsson inçe ciarè da s'assicuré se instèsc. Chilò dessel inçe gnì ciarè da curi i caji che podess avèi consequènz finanziaries relevantes. Chisc caji é cater: le cajo de mort por inzidènt o maratia y la invalidité permanènta por inzidènt o maratia. An dess ma porvè da se fà n iade n ponsier de cì che al sozeda sce le partner romagn invalid do n inzidènt, cì spèises che an mess sostegnì, cì che al ess da sozede sce le partner ess da mancè, dantadöt sce al é debiç por la cìasa o d'ater. Inçe chilò mèsset sambègn gnì valutè i massimai y les condiziuns de assicuraziun inçe por cì che reverda franchiges eventuales. Sce n dependènt s'assicurèia chisc cater caji spo pòn dè che al é assicuré bun. Chilò laprò podess ciamò un se fà les garanzies de degènta – che foss chères che dà ca intant al dé por ospedal y/o ghips. Mo cìodi pa dè fora magari n valgügn cènc de euro por

garanzies che ne müda nia la vita? Por i autonomes se müda sambègn la valutaziun ajache a chi i tómel efetivamènter fora le davagn te chi dis che ai é te ospedal o che ai à le ghips, deache ai ne po nia plü lauré. Ala fin oressi dè che an ne dess nia gnì pessimisé mo efetivamènter ne sà nia canche na desgrazia podess tochè se instèsc o n familiar. Vèi él sigü inçe che ares costa cotan les assicuraziuns, y düc n'è gnanca i mesi da assuré döt y düc – chilò foss spo n consulènt che podess daidè da analisé la situaziun y sotriissé cì che é important por vignun, y spo ma assuré i caji prioritars.

Doturs y avocac

Döes poscibilitè ch'i oress ciamò mostrè sö tl setur privat é les spèises dl dotur y les spèises legales. La pröma assicuraziun é ponsada por chès porsones che ô tl cajo de inzidènt o de maratia podèi se chirì fora le dotur tla clinica che ai ô. Por chi che é indere contènc cun le sorvisc pitè dal distret sanitar, n'è chèsta assicuraziun nia interessanta.

L'assicuraziun por les spèises legales, o spèises d'avocat, é ché garanzia che tröc à sòn süa assicuraziun dal auto, mo ma dailò. Al é inçe la poscibilitè da fà assicuraziuns che cür vigni cajo, olache an mès se defène tres n avocat; l'assicuraziun po valèi por dōta la familia y por düc i auti dla familia.

N valgönes riflessciuns finales

Sciöche dit, n'è degöna de chèstes assicuraziuns d'oblianza. Mo vignun dess se fà n valgügn ponsiers sòn süa situaziun individuala. Cì sozèdel pa sce? Aldédaincö mèsson ciarè de vigni euro, bègn porchèl mèsun ciarè da dè fora i scioldi sòn la basa dles esigènz che an à. Porchèl, cun l'aiüt de n consulènt, él dantadöt poscibil da analisé la situaziun y chirì la dërta dezijiun. Magari dän bele fora na certa soma por assicuraziuns; cun la mudaziun dla destinaziun podessun bele curi dami les esigènz de vignun.

Na cossa ch'i oress ciamò dè é che cun la lege nöia Bersani pòn aldédaincö desdè vigni contrat d'assicuraziun ala scadènta anuala, adinfora di contrac che é gnüs fac por deplü agn; chisc pòn desdè impormò do le terzo ann.